

**ANG**

Bayan

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXIX No. 21
Nobyembre 7, 2008
www.philippinerevolution.net

Editoryal

Korapsyon sa tunga sang krisis

Liwat nga nabuyagyag ang wala katapusan nga korapsyon, kagarukan kag pagmaniobra sang rehimen ng Arroyo sa paglupok liwat sang daan kag bag-o nga dalagko nga kaso sang korapsyon. Labi nga nagtampok ang halambalanon subong bangud sa lain-lain nga padihut ang ginahimo sini para mapunggan ang imbestigasyon kay anay Undersecretary of Agriculture Jocelyn “Jocjoc” Bolante. Si Bolante, pu-no nga opereytor ni Arroyo sadtong 2004 sa pagpanulisan sang P2.4 bilyon nga pondo sang Ginintuang Masaganang Ani, ginpabalik sa Pilipinas pagkatapos ginbalibaran sang US ang ginhingyo niya nga *asylum* (pag-inakop) didto.


Wala sang kinatuhay ang mga maniobra subong sang nagaharing rehimen sa pagbusal man sini sa iban pa nga mahimo magtestigo bahin sa mga krimen nga ginadalahan sang pamilyang Arroyo. Ang desperado kag baraghal nga pagtuyo sang rehimen ng Arroyo nga pungan nga maghambal si Bolante sa Senado nagapakita sang grabe nila nga pagkahadlok nga mahayag sa publiko ang ginadalahan nila nga mga kagarukan kag krimen nga patud nga makapaigrab sa kaakig sang banwa.

Todo-todo ang pagtinguha sang re-

himeng Arroyo nga ipabilin nga nakasara ang mga sekreto sang kagarukan sa pondo sang Ginintuang Masaganang Ani ilabi na nga plano nila nga gamiton liwat ang amo nga iskema sa nagahilapit nga eleksyon 2010. Sa ginaproponer nga badyet sang rehimen para sa 2009, masobra P3.3 bilyon ang gintalana ni Arroyo para kuno sa pagbakal kag pagpanagtag liwat sang abono. Kabahin ini sang P7 bilyon nga bag-ong alokasyon para sa Ginintuang Masaganang Ani—ang mismo programa nga ginahimo nga bulugasan nanday Arroyo kag Bolante sadtong 2004. Wala-tuo ang iban pa nga padihot nanday Arroyo kag sang iya mga sulugon agud labi pa nga maubos ang kabang-maggad sang banwa.

Ang paglala sang korapsyon ni Arroyo sining ulihi nga mga tuig sang iya pagginahum kabahin sang mga paghanda niya para labi nga masiguro ang pagpabilin niya sa poder lampas sa 2010. Labi nga nagahugot ang kapyot niya sa poder sa labaw nga kakulba nga pasabton siya sa iya mga kasal-anan sa banwa.

Pila ka pulo ka bilyon nga pondo ang ginatipon ni Arroyo bilang preparasyon sa pagaatubangon niya nga mga pangpulitika nga inaway kadungan sang pagtinguha niya nga magpadayon ang iya poder lampas sa iya subong nga termino. Pagagamiton niya ini nga pangbakal sang suporta sang mga pulitiko para sa iskemang cha-cha



**Mga tampok sa
isyu nga ini...**

26 armas naagaw, 43
kaswalti sg AFP-PNP
PAHINA 4

7 detenido nga kaupod
sa Quezon, ginpalagyo
sg BHB
PAHINA 5

Imperyalismong US sa
idalum ni Obama
PAHINA 11

(*charter change* ukon pagbag-o sang konstitusyon) agud pahanugutan ang liwat niya nga pagdalan bilang presidente ukon punong ministro. Kon indi man, pagagamiton niya ang higanteng pondo para mapat-ud nga sa iya gihapon ang lealtad sang mga napadaog nga kandidato pananglitan mada-yon gihapon pareho sang una ang eleksyon sa 2010. Kadungan sini, ginagamit ni Arroyo ang pondo nga ini agud baklon ang lealtad sang mga upisyal militar kag pulisya pananglitan magkadto siya sa pagpataw sang pagginahum militar kon mapaslawan ang ginaduso niya nga cha-cha.

Bangud sa labing nagagrabe subong ang sosyo-ekonomikong krisis, kada isa ka sentimo nga kawaton ni Arroyo halin sa pondo sang banwa nagadugang sa hapdi sang nagakalam nga suluk-sulok sang nagaantos nga pumuluyo. Sa pagpangawat ni Arroyo sang binilyon ka pisos, labi nga nagalumoy sa kaimulon kag pagkaulipon kag labi nga nagaindakal sa kaakig ang pumuluyo. Nagaawas ang mga bulsa nanday Arroyo samtang minilyon ang ginagutom, wala sang duta nga matalauma, wala sang iban

nga palangitan-an, wala sang disente nga balay nga maulian. Tuman kadamo ang may balatian nga indi makabakal sang bulong, minilyon nga estudyante ang napwersa nga magsulod sa mga guba-guba nga eskwelahan kag wala sang pasilidad kag minilyon pa ang indi man makabutho bangud sa kaimulon kag lunsay nga wala sang buasdamlag nga malauman.

Pagahusgahan sang kasaysayan ang rehimeng US-Arroyo bilang isa sa pinakagaruk nga gubyrno nga nagagamit sang poder para makahugakum sang daku nga manggad kag mangpigis, sa labaw nga kahalitan sang pumuluyo.

Indi dapat palusuton sang pumuluyo ang wala-tuo nga pagbinutig, pagdinaya kag pagpangawat ni Gloria Arroyo. Indi dapat pahanugutan nga magdugay pa siya sa poder. Ang tanan nga pagpakuno-kuno kag pagmaniobra kag ang kada tinion nga pagpabilin niya sa gahum iya ginagamit agud labi pa nga mandambong kag hugton ang kadena nga nagagapos sa pumu-

luyo.

Dapat gamiton sang pumuluyo ang tanan nga pamaagi agud mapunggan ang lain-lain nga iskema ni Arroyo para mapalawig pa ang iya pagginahum. Dapat padayon nga magtinguha ang tanan nga pwersang demokratiko, patriyotiko kag anti-Arroyo nga maghiliusa sa pihak sang pagtinguha sang Malacañang nga tunga-tungaon kag dugmukon sila. Dapat pandayon ang paghiliusa nga ini agud matipon nila ang kusog para nga mapabagsak si Arroyo.

Labi nga mangin muklat ang pumuluyong Pilipino sa kakinahanglanon sang rebolusyonaryong pagbangon samtang labi sila nga nagakalumos sa kaimulon kag pagkaatrasado sa tunga sang padayon nga nagalala nga krisis sosyo-ekonomiko kag mga krimen sang nagaharing rehimen. Samtang nagasingki ang kapintas sang rehimeng Arroyo, labi nga nagalig-on ang determinasyon sang pumuluyo nga baktason ang dalan sang armadong rebolusyon.

Sa pagtinguha sang malapad nga rebolusyonaryong kahublagan sa idalum sang pagpamuno sang Partido Komunista sang Pilipinas (PKP), kag pagpursiger sang tanan nga mga anti-imperyalista, antipyudal kag antipasistang pwersa, labi nga nagabaskog kag nagalapnagon ang pagbato sang pumuluyong Pilipino. Wala sang kataka ang pagtinguha sang mga rebolusyonaryo, patriyotiko kag demokratikong pwersa sa pagtib-ong sa interes sang pumuluyo kag pagpasulong sang ila mga paghimakas. Padayon nga pasingkion ang mga taktikal nga opensiba sang mga armado nga rebolusyonaryong pwersa, mga paghimakas sang pumuluyo kag iban pa nga pamaagi sang pagbato para tapuson ang pagginahum ni Arroyo kag iatubang siya sa paghusgar sang banwa.



Tuig XXXIX No. 21 Nobyembre 7, 2008

Ang *Ang Bayan* ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa *Philippine Revolution Web Central* nga makit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ikauswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editorial

Korapsyon sa tunga sg krisis 1

Pagbusal kay Bolante 3

Madinalag-on nga TO

26 nga armas naagaw sa mga opensiba 4

43 aksyong militar ng BHB sa Samar 5

7 detenido sa Quezon, ginpalagyo sg BHB 6

Operasyon dis-arma sa Davao Oriental 6

Pagpalagyo halin sa kaaway 7

Kursong pang-upisyal sa Eastern Visayas 7

Pagpanghalit sg pasistang estado

Paglagas sa mga ligal nga aktibista 8


Target: Mga aktibista sa ST 9

Mga Moro, biktima sg militarisasyon 10

Imperyalimong US sa idalum ni Obama 11

Balita 12

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas



Pagbusal kay Bolante

Bangud sa deportasyon sang US kay anay Undersecretary of Agriculture Jocelyn "Jocjoc" Bolante sadtong Oktubre 28, indi na epektibo ang daan nga gawi sang rehimen nga taguon siya sa pungsod ukon indi gani palutson siya paggwa sa Pilipinas para makalikaw sa imbestigasyon sa mga higante nga kaso sang korapsyon nga ginaatubang niya. Bisan pa man, wala pa gihapon nagauntat ang rehimen sa mga palusot kag maniobra.

Si Bolante ang nagapanguna nga opereytor ni Arroyo sa pagkurakot sa P2.806 bilyon nga pondo sang Ginintuang Masaganang Ani nga gingamit sa kampanya sang administrasyon sa eleksyon 2004. Pinakakontrobersyal lang nga bahin sini ang P728 milyon *fertilizer fund* nga tadtad sang mga anomalya.

May mando ang Senado sadto pa sang 2005 nga ipaaresto si Bolante, makaligad ang pasulit-sulit nga paglikaw niya nga magtambong sa imbestigasyon sang Senado sa kaso. Ginpalikaw siya sang rehimeng Arroyo pagwa sa pungsod sadtong 2005 kag nangayo siya sang *asylum* sa US sadtong 2006. May maathag nga pagtan-aw na ang madamo sa Senado nga nakasala si Bolante kag kinahanglan na lang makuha ang testimonya niya para mapormalisa ang husga kag masarhan na ang kaso.

Wala mahimo sang Malacañang nga himuon ang ala-Jun Lozada nga

pag-uyat kay Bolante bangud nakatutok sang husto ang midya kag publiko sa iya nga pag-uli. Apang samtang gindiretso sa St. Luke's Medical Center sa Quezon City, kon anu-ano na ang ginaisip nga mga maniobra sang rehimen para indi mapaatubang si Bolante sa Senado kag sa sini mabusalan siya.

Para maglawig pa siya sa ospital, kon anu-ano ang ginapagwa nga sakit ni Bolante sa pihak sang ginahambal sang iya *medical bulletin* nga istable kag normal ang iya nga kondisyon. Ginderetso si Bolante sa ospital pagkatapos ini nga magreklamo nga masakit ang dughan sang makahugpa na ang eroplano sa Manila International Airport. Lain sa kinaandan nga pasyente, wala siya ginderetso sa *emergency room*, sa baylo sa isa ka malahalang nga kwarto sang St. Luke's kon sa diin may nagahulat na nga mga doktor. Ginmaduan ni Dr. Ramon Saavedra, ang doktor ni Bolante, nga indi siya magbaton sang

mga bisita.

Kadungan sini, ginapadali ni Bolante sa Supreme Court nga aprubahan ang petisyon para sa *temporary restraining order* (TRO) para pungan ang Senate Sergeant-at-Arms nga arestuhon siya kag paatubang sa Senado. Sining Nobyembre 3 ginbawi sang abogado ni Bolante ang petisyon para sa TRO bangud sa kamatuoran ginaresto na sang Senado ang iya nga kliyente.

Samtang, ginbuksan sang Department of Justice ang imbestigasyon sang Office of the Ombudsman sa kaso sang pagpanulisan sa P432 milyon nga pondo nga pang-abono nga ginpasaka sang peryodista nga si Marlene Esperat batuk kay Bolante. Ini pagkatapos tulugan ang kaso sang tatlo ka tuig ni Ombudsman Merceditas Gutierrez, abyan sang mga Arroyo.

Ang gulpehan nga pagbukas sang imbestigasyon nga ini ang ginagamit subong nga rason para pungan ang Senado sa kaugali-ngon sini nga imbestigasyon. Suno kanday Sen. Edgardo Angara kag Juan Miguel Zubiri, duha sa pinakamasupog nga tagasakdag sang mga Arroyo, magabanggianay lang kuno ang Senado kag ang Ombudsman kon ipursige pa ang Blue Ribbon Committee ang imbestigasyon. Suno kay Gloria Arroyo, nagapasikat lang ang mga senador kag kongresista nga nagapursige nga buksan liwat ang imbestigasyon sa *fertilizer fund scam* kag iban pa nga iskandalo nga nadalahig ang Malacañang.

Sining ulihi, nagpasaka sang petisyon para sa *writ of habeas corpus* si Owen Bolante, anak ni Bolante, sa Court of Appeals. Gina-lauman sang mga Bolante kag guban nanday Arroyo nga magapabor sa administrasyon ang nasambit nga hukmanan, pareho sang nangin padron sang madamo nga desisyon sini sang nagligad.

AB



26 armas nakumpiska, 43 kaswalti naagum sang AFP-PNP

Biente'y kwatro nga mataas kalibre nga riple kag duha ka pistola ang nakumpiska sang mga Pulang hangaway sang Bag-ong Hangaway sang Banwa (BHB) sa separado nga mga taktikal nga opensiba nga ginlunsar sang mga gerilya umpisa Oktubre 4 tubtob Nobyembre 5. Biente'y tres sang elemento sang Armed Forces of the Philippines (AFP), Philippine National Police (PNP) kag CAFGU ang napatay kag 20 ang nararong sa mga inaway.

Nobyembre 5. Isa ka elemento sang CAFGU ang napatay sang isnaypin siya sang mga Pulang hangaway sa gwa sang ila detatsment sa sityo Balagonon, Barangay Managa, Bansalan, Davao del Sur.

Nobyembre 3. Isa ka soldado sang 57th IB ang nararong sa isa ka engkwentro sa tunga sang mga Pulang hangaway sang BHB kag militar sa Sityo Talahek, Barangay Bacong, Tulunan, North Cotabato.

Nobyembre 1. Duha ka elemento naman sang CAFGU ang nararong sang lusubon sang Pulang hangaway ang detatsment sang militar sa Barangay Mararag, Marihatag, Surigao del Sur.

Oktubre 29. Anom ka riple nga M16 kag isa kalibre .38 rebolber ang nakumpiska sang mga Pulang hangaway sang BHB sa Jose C. Aquino Rubber Company, isa ka plantasyon sang goma sa Barangay Sta. Teresita, Bayugan City, Agusan del Sur. Kadungan sini, ginkumpiska sang mga gerilya ang M16 sang isa ka sarhento sang AFP sa isa ka tsekpoynt nga gintukod sang mga gerilya sa Barangay San Jose, Prosperidad, Agusan del Sur.

Oktubre 25. Sa North Cotabato, napulo'g anom nga mataas kalibre nga armas ang nakumpiska sang BHB kag milisya sang pumuluyo sang lusubon nila ang detatsment sang CAFGU sa idalom sang 37th IB nga ara sa sulod sang plantasyon sang Dole- Stanfilco sa barangay Luna Sur, banwa sang Makilala. Isa ka

elemento sang CAFGU ang napatay kag isa ka sarhento kag tatlo pa ka elemento sang CAFGU ang nararong.

Gin-ambus man sang isa pa ka grupo sang mga Pulang hangaway ang mga soldado sang 57th IB halin sa Barangay Luna Norte nga magatabang tani sa ginreyd nga detatsment.

Suno kay Ka Dencio Madrigal, tagapamaba sang Valentin Palamine Command sang BHB sa Far South Mindanao, ang nasambit nga rey aksyon pagsilot sa Stanfilco sa pagpang-agaw sini sang duta sa magagmay nga mangunguma kag pagpamintas sa mga mamumugon sini. Sa subong, masobra 30,000 ektaryas na ang kalaparon sang mga plantas-

yon sang saging kag pinya sang Dole-Stanfilco sa rehiyon.

Antes sini ginpaandaman na sang BHB ang Stanfilco nga untaton na ang pagpang-agaw sang duta kag pamatian ang reklamo kag demanda sang pumuluyo. Apang sa baylo nga pamatian ang reklamo sang pumuluyo, labi pa nga nangin agresibo kag pasista ang relasyon sang Dole-Stanfilco sa mga mangunguma kag mamumugon. Gindugangan pa sini ang tinawo sang detatsment kag ginpabaskog kag ginpadasig ang mga operasyon sang militar sa plantasyon.

Oktubre 25. Isa ka soldado sang 66th IB ang nararong sang ambuson sang mga gerilya sang BHB ang trak nga ginasakan sang mga soldado sa Barangay Olaycon, Monkayo, Compostela Valley. Antes sini, isa ka soldado ang napatay sang lusubon sang mga gerilya sang BHB ang detatsment sang Special Forces Battalion sang Philippine Army sa Barangay Canidkid, banwa sang Montevista.

Oktubre 24. Walo ka soldado

43 aksyong militar, ginlunsar sang BHB sa Samar

SAISENTA'Y nuebe nga elemento sang kaaway ang napatay sa sunod-sunod nga mga aksyong militar ang ginlunsar sang Bag-ong Hangaway sang Banwa (BHB) sa isla sang Samar halin Enero tubtub una nga simana sang Septyembre. Baynte'y singko ka elemento sang kaaway ang napilasan sa nasambit nga mga inaway samtang lima ka Pulang hangaway ang namartir. Napulo'g lima ka matag-as nga kalibreng armas ang naagaw sang BHB.

Suno sa pang-umpisa nga lista sang Regional Operations Command sang BHB sa rehiyon, halin Enero tubtub Setyembre 6 nakalunsar ang BHB sa isla sang 43 aksyong militar sa mga prubinsya sang Samar, Northern Samar kag Eastern Samar. Nagalakip ini sang isa ka reyde, lima ka ambus, 29 ka operasyong isnayping/harassment, pito ka *special operation* kag isa ka pagdis-arma. Naatubang man kag napangibabawan sang BHB ang anum ka dependsiba kag lima ka engkwentro.

Sa 43 aksyong militar, 24 ang natabo sa Samar, 15 sa Northern Samar kag apat sa Eastern Samar.

Ang padayon nga mga aksyon militar ginalunsar sang BHB bilang kabahin sang kampanya agud paslawon ang pagpanghalit sa isla sang Oplan Bantay Laya 2.

AB



ang napatay, lakip ang puno nga opisyal nila nga tinyente, sang ambuson sang mga Pulang hangaway sang BHB ang nagapatrolya nga tropa sang 66th IB sa Barangay Manurigao, New Bataan, Compostela Valley.

Oktubre 23. Isa ka elemento sang CAFGU ang napatay kag apat pa ang nararong sang lusubon sang mga Pulang hangaway ang detatsment sang CAFGU sa idalom sang 72nd IB

sa Paquibato District, Davao City.

Samtang sa Catanduanes, walo ka soldado ang napatay kag tatlo ang nararong sang paulanan sang bala sang mga Pulang hangaway sang Nerissa San Juan Command (NSJC) sang BHB-Catanduanes ang payag nga ginakampuhan nila. Su-no sa report ni Ka Theresa Magtang-gol, tagapamaba sang NSJC, ginhi-ngalitan sang mga kaupod ang ka-

poy nga mga tropa sang Philippine Army kag CAFGU nga nagapahuway sa isa ka bakante nga payag sa Barangay Hilawan, banwa sang San Andres. Pila ka adlaw nga ginasuyod sang kaaway ang magkatambi nga barangay sang Tibang, Barihay kag Hilawan samtang ginamonitor naman sila sang mga gerilya. Sa kahadlok nga mahapitan sang mga bala, nagdalagan palayo sa lugar sang engkwentro ang isa pa ka iskwad sang militar nga nagapahuway man sa malapit nga lugar.

Oktubre 19. Isa ka abusado nga pulis ang ginkumpiskahan sang mga Pulang gerilya sang kalibre .45 pistola kag isa ka riple nga M14 sa tindahan sang Escalante City, Negros Occidental.

Oktubre 13. Isa ka elemento sang CAFGU ang nararong sang salakayon sang mga gerilya sang BHB ang detatsment sang 72nd IB sa Sityo Bukobuko sa Anay, Barangay Kingking-Poblacion, Pantukan, Compostela valley.

Sa Davao del Norte, duha ka soldado ang napatay sang ambuson sang mga Pulang hangaway ang isa ka trak sang militar sa banwa sang Talaingod. Antes sini, isa ka elemento sang CAFGU ang napatay sang salakayon sang BHB ang detatsment sang 72nd IB sa Barangay Palma Gil sa amo man nga banwa.

Isa pa ka elemento sang CAFGU ang napilasan sang palukpan sang mga gerilya ang ginsimpon nga pwersa sang 72nd IB kag CAFGU sa Sityo Likupon, Barangay Sanghay, Mati, Davao Oriental.

Oktubre 4. Tatlo ka soldado sang 29th IB ang nararong sang ambuson sang mga Pulang hangaway ang ila komboy sa Sityo Kapihan, Barangay Concepcion, Valencia City, Bukidnon.

Wala sang nareport nga mga kaswalti sa bahin sang mga Pulang hangaway sa tanan nga mga taktikal nga opensiba nga ini.

7 detenido nga kaupod, ginpalagyo sang BHB sa Quezon

WALA sang lupok nga ginreyd sang mga Pulang gerilya sang Apolonio Mendoza Command (BHB-Quezon) sining Oktubre 25 ang Quezon Provincial Jail sa Lucena City kag ginpalagyo ang pito ka kaupod nga nakadetenir didto. Natigayon ang reyde sa sulod lamang sang napulo ka minutos.

Agud makasulod sa bilangguan, ang mga Pulang hangaway nagpakuno-kuno nga mga elemento sang Special Weapons And Tactics (SWAT) kag Philippine Drug Enforcement Agency (PDEA) nga kuno may kuhaon nga bilanggo. Gintabo nila ang pagsalakay sa panahon sang pagbaylo sang gwardya. Samtang nagapaguwa ang mga gwardya, nagahulat naman ang mga Pulang gerilya sa mga guluhaan.

Gilayon nila nga gintayaan, ginpahapa kag dinis-armahan sang lima ka rebolber ang mga gwardya antes sila nga ihunong sa bilangguan upod ang iban pa nga gwardya. Isa ka *private security guard* ang nagtuyo nga magtabang halin sa kalapit nga bilding pero ginabangan siya sang mga Pulang hangaway, kinumpiska ang iya *shotgun* kag gin-upod siya sa nauna na nga ginhunong nga mga gwardya.

Sakay sang apat ka *van*, gilayon nga nag-atras sa magkatuhay nga direksyon ang mga gerilya matapos ang madinalag-on nga pagsalbar. Duha ka pulis ang napilasan sang abangan nila ang mga gerilya sakay sang isa sa mga *van* sa isa ka tsekpoynt sa Barangay Iyam, Lucena City. Hinabuyan sang mga Pulang hangaway sang grana-da ang mga pulis antes magpadayon sa pagpalagyo.

Ang makahason nga operasyon sang BHB gintigayon sa sentrong bahin sang Lucena City kon sa diin makit-an ang Quezon Convention Center, Regional Trial Court, Philippine National Red Cross kag ang kapitolyo sang prubinsya. Malapit man ang Quezon Provincial Jail sa Camp Guillermo Nakar, puno nga hedkwarters sang Southern Luzon Command.

Isa ka bulan nga ginpanilagan sang mga gerilya ang hulag sang kaaway antes tigayunon ang operasyon. Pito ka pistola kag isa ka *shotgun* ang nakumpiska nila sa espesyal nga operasyon nga ini.

Ikaduha nga kahigayunan na ini nga pagpalagyo sang mga bilanggong pulitikal sa Southern Tagalog. Sadtong Enero 14, 2006, ginpalagyo man sang mga Pulang hangaway sang Edgardo Dagle Command ang siyam ka gerilya sang BHB nga nakahunong sa Bata-ngas Provincial Jail sa Batangas City.

AB

AB



Operasyon dis-arma sa Davao Oriental Provincial Jail

Ang artikulo nga ini ginbase sa report koresponsal halin sa mga kaupod sang 3rd Pulang Bagani Company sang BHB sa Southern Mindanao.

Makahason man ang ginlunsar nga operasyon dis-arma sang mga Pulang hangaway sa Davao Oriental Provincial Jail sa Mati City sadtong Mayo 19. Ang mga gerilya naghalin sa 3rd Pulang Bagani Company, upod ang tig-isa ka iskward sang Front 2 kag Front 27.

Sa sulod lamang sang mas o menos 15 minutos, nasulod sang mga Pulang hangaway ang *provincial jail* nga pila ka kilometros lamang ang kalayuon sa *city hall* sang Mati. Nakumpiska nila ang duha ka M16, isa ka M14, duha ka Garand, tatlo ka karbin, duha ka *shotgun*, duha ka pistola nga 9 mm, isa ka .45, isa ka .357 kag nagkalain-lain nga bala. Nakakumpiska man ang mga gerilya sang mga magasin, 12 posas, isa ka *base radio* kag mga *hand-held radio*.

Wala sang ihibalo ang mga gwardya sang *provincial jail* nga mga gerilya sang BHB ang mga nakaunipormado nga sakay sang duha ka trak kag isa ka *van*. Gindala gilayon sang *strike squad* sang BHB ang mga gwardya sa *gate* pasulod sa upisina sang *jail warden* samtang duha pa ka tim sang mga gerilya ang nagkadto sa tore sang *guard house*, sa purok nga ginaistambayan sang mga gwardya kag isa pa ka tore nga kaiping sang armori. Ang isa pa ka iskward ara sa guwa kag nagaobserbar sa hulag sang mga gwardya.

"Armas lang among tuyo." (Armas lang ang tuyo namon.) Ini ang siling sang mga gerilya matapos sila nga magpakilala nga mga gerilya sang BHB kag magdeklarar sang pagdis-arma. Nakibot ang mga gwardya. Sa sobra nga kahadlok wala na sila sang nahimo kundi ihatag nga wala sang lihok ang ka-


pot nila nga mga *shotgun*. Wala man nakahambal ang *jail warden*.

Samtang ginatigayon ang pagdis-arma, may mga bilanggo nga nagpahayag sang pasalamat bangud suno sa ila, nasulod gid man ang nasambit nga bilangguan nga kilala sa korapsyon kag nahatagan sang leksyon ang mga abusado nga gwardya. May pila ka bilanggong kriminal nga naghingyo nga hilwayon sila, pero bangud nagasunod ang mga Pulang hangaway sa prin-

sipyo sang rebolusyonaryong hustisya kag di sa simpleng pagpahilway lamang sang sin-o man nga nakahunong, wala nila ginsunod ang nasambit nga hingyo. Sa amo pa man, sang mag-atras na ang mga kaupod, may isa ka bilanggo nga nagsinggit sang "Mabuhay ang NPA! Mabuhay ang rebolusyon!"

Nakaabot sa PNP ang report bahin sa reyd pero wala sang nahimo ang mga pulis kundi abangan ang karsada pakadto sa ila hedkwarters. Siling sang mga bumbero nga nakahedkwarters man sa malapit, mayayo lang kuno kon mag-atake sa litson ang mga pulis, pero kon ginaatake na sang kaaway wala na nagaresponder.

Masadya gid ang masa sang makita nila ang mga kaupod pagkatapos sang taktikal nga opensiba bangud wala sang nauyang nga bala kag kabuhi nga nadaga sa kubay sang mga kaupod. AB



Pagpalagyo halin sa kaaway

// Bug-os na ang buot ko sadtong adlaw nga ina nga indi ako magpa-dakup sang buhi sa mga kaaway kag nakaukit na sa isip ko nga han-da ako mapatay para lang makapalagyo!”

Ini ang ginsiling ni Kaupod Don, isa ka Pulang hangaway sa isa ka prubinsya sa Southern Tagalog nga nakapalagyo sa kamot sang ka-away pagkatapos ang 17 adlaw nga pagkabihag.

Nadakup sanday Ka Don kag du-ha pa ka hangaway sadtong Sep-tyembre sa tunga sang pagtungod sang hilikuton paniktik bilang pag-handa sa isa ka taktikal nga opensi-ba. Sang sila dakpon kag dalhon sa kampo sang militar gilayon sila nga ginpaidalum sa sikolohikal nga tor-tyur. Ginpahug sila nga maumid ang ila pamilya kon indi sila makigbuli-gay sa kaaway. Ang iya upod wala makapadugay sa amo nga pamahug kag napilitan nga maghatag sang impormasyon sa kaaway. Pero si Ka Don nagpakalig-on kag wala magti-pyok sa kaaway.

Gintilawan man sang kaaway nga tanyagan si Ka Don sang daku nga kwarta kon itudlo niya ang

iban pa niya nga kaupdanan. Wala sang anuman nga epekto ini sa iya. Sadtong ika-15 adlaw sang pagka-bihag sang kaaway, nagplano na si Ka Don nga magpalagyo sa kampo. Una niya nga gintilawan nga mag-agi sa pwertahan sang ila karsel kag magsalisi pero may kaaway nga nakapwesto diri sa adlaw nga ina. Masunod nga adlaw naman natabu-an nga may nagabantay nga sulda-do sa palibot. Sadtong masunod pa nga adlaw nakakita siya sang kahigayu-nan sang masiplatan niya nga na-ga-inuman ang mga suldado.

Nagli-sensya la-mang siya sa

iya kapareho nga detenido nga ku-haon niya ang iya ginsampay nga bayo. Pero pagkakuha sa mga bayo gilayon niya nga ginputos ang mga ini, dungan dalagan nga paggwa sa presohan.

Pagkaguwa niya, kinahanglan pa niya nga lampasan ang mga *bar-bed wire* nga nakapalibot sa de-tatsment kag ang mga suga nga dalagku sa sulod sang kampo. Ha-los 20 hilera sang *barbed wire* ang iya ginlutsan. Nagkalapilas siya



Kurso nga pang-upisyal sang BHB sa Eastern Visayas, nagasulong

I sa ka gatos na nga upisyal kag kadre sang Partido I kag Bag-ong Hangaway sang Banwa (BHB) sa Eastern Visayas ang nakatapos sang espesyal nga kurso sang paghanas pang-opisyal humalin sang buksan sang Efren Martires Command sang BHB ang eskwelahan sang pulitiko-militar sini sadtong Disyembre 2007.

Kabahin sang espesyal nga kurso ang pagtuon sang mga pagsulondan sang inaway sa kabilugan, mga leksyon halin sa pagpakig-away gerilya sa China kag Vietnam, mga partikular nga kinaia sang inaway banwa sa Pilipinas kag mga leksyon halin sa inagihan sang pagpakig-away gerilya sa rehiyon. Ginsentruhan man sang kurso pagdirihir sang gera sa taktikal nga lebel (pareho sang aksyon militar) kag operasyunal nga lebel (pareho sang serye sang mga aksyon mili-tar sa mas malapad nga sakop kag panahon).

Sa mga teoritiko nga mga pagtuon, ginakumbinar ang lektura kag mga *workshop* kag pagtuon sang mga pili nga inagihan ukon *case study*. Ginahimo man ang pila ka *military exercise* kag *drill* para may ara sang is-tandardisasyon sa pagdala diri sang mga upisyal sa tag-sa nila ka yunit ukon erya. Ginsal-ot ang pagha-nas sa mga upisyal sa istap base sa kinahanglanon, pareho sang mga *crash course* sa hilikuton paniktik kag komunikasyon. May partikular naman nga pagha-nas sa mga upisyal pangpulitika sa iskwad kag platun.

Sa lima ka bats nga nakatapos sang mga kurso sa eskwelahan, nag-abot sang anom tubtob napulo ka adlaw ang mga paghanas. Suno sa mga nakatapos, signipikante ang nadugang sa ila ang kumpyansa kag ihibalo sa pagpamuno kag pagdirihir sang mga ina-way kag kampanya militar.

AB

samtang ginatabuk ang halos isa ka ektarya kadaku nga kampo.

Pagkaguwa niya sa detatsment ginbaktas niya ang haywey para makakadto sa mga baryo nga iya nahibal-an. May instansya nga may nakasumalang siya nga mga suldado, gani nagpahigad lamang siya agud indi makilala. Nag-abot sang tatlo ka oras ang iya paglakat antes niya malab-ot ang isa ka baryo kon sa diin nahibal-an niya nga makabulig sa iya.

Kaaganhon sang siya nag-abot sa baryo. Uhaw gid siya sadto kag nagakurog sa tugnaw kag kapoy sa kalawig sang iya ginlakat. Nagpanuktok siya sa isa ka payag kag sang pagbukas sang pwertahan nagpakilala siya nga hangaway sang BHB. Ginpaathag niya sa tag-iya sang balay nga nagpalagyo siya sa kampo kag nagapangayo siya sang bulig nga makaangot sa Hangaway.

Sadtong una nakulbaan ang tagbalay kag nag-alangan nga magbulig. Pero ginpaabutan siya sang mga Pulang hangaway nga natabuan nga ara sa baryo man sadto nga asikasuhon si Ka Don. Gilayon naman niya nga ginpakaon kag ginpatulog ang kaupod.

Wala nagdugay nag-abot ang isa ka tim sang mga Pulang hangaway agud sugilan-on si Ka Don. Gintun-an sang pamunuan sang yunit ang ginreport nga resulta sang interbyu kay Ka Don kag nakumbinsi sila nga tampad ang iya panaysayon. Pagkagab-i ginpasugat na siya kag gilayon siya nga gin-upod liwat sa yunit.

Delayawon ang desisyon ni Ka Don nga magpakalig-on samtang ara sa kamot sang kaaway kag ang iya maid-id nga pagplano nga magpalagyo. Makuhaon ini sang leksyon para sa sin-o man nga kaupod nga mabutang sa amo nga sitwasyon nga mag-angkon sang kusog kag kalig-on sang buot nga atubangon ang amo nga mga kahimtangan. **AB**

Paglagas sa mga ligal nga aktibista, nagalapnag

Iligal nga pag-aresto sa mga personahe sang ligal nga demokratikong kahublagan kag pagpasaka sang mga himu-himo nga kasong kriminal batuk sa ila ang pinakatampok sa mga kaso sang paglapas sa tawha-nong-kinamatarung nga nakalap sang *Ang Bayan*.

Nobyembre 6. Ginluthang tubtub sa mapatay sang mga apat ka lalaki nga sakay sa motorsiklo si Danny Qualbar, *municipal coordinator* sang Bayan Muna sa Compostela, Compostela Valley. Pauli sadto si Qualbar sa iya balay sang ambuson siya sa banwa sang Osmeña sa nasambit nga prubinsya banda alas-5:30 sang hapon.

Sa Laguna, gintuyo ang kabuhi ni Arnold Cerdo, bise presidente sang Sensous Union Labor Organization kag istap sang Cabuyao Workers Alliance sa Calamba City. Kasugilanon sadto ni Cerdo ang iya bayaw sa iya balay sa Riverside, Calamba City banda alas-9:30 sang gab-i sang luthangon sila sang duha nga lalaki nga nakabonet. Gama-yan nga maigo sang bala ang nawong ni Cerdo.

Nobyembre 4. Ginbasura sang korte ang petisyon para sa *writ of amparo* sang pamilya ni Mary Grace Delicano, myembro sang Gabriela nga ilegal nga gin-aresto sadtong Septyembre sa Bacolod City. Ini sa pihak sang iregularidad sa pagkaaresto sang PNP kay Delicano. Nakasaad sa mandamyento de aresto nga gingamit sa pagdakup kay Delicano nga ini para sa isa nga may alyas nga “Kim” nga akusado sang pagpangawat kaangot sang isa ka reyd sang Bagong Hangaway sang Banwa (BHB) sa Escalante, Negros Occidental sadtong Marso 2005 kon sa diin nakaagaw ang BHB sang siyam ka armas. Wala sang anuman nga sambit sa ngalan ni Delicano sa

mandamyento. Kag ginpaamyenda na lang sang pulisya sa korte ang mandamyento nga si Delicano kag si “Kim” isa man lang kuno matapos ang pagkaaresto kay Delicano.

Oktubre 31. Gintuyo nga pungan ni Lt. Col. Manuel Sequitin, hepe sang 66th IB, ang pagbakwet sang mas o menos 300 pamilya halin sa Barangay Andap, New Bataan, Compostela Valley sa pihak sang peligro sa ila kabuhi dulot sang mga operasyon militar sa ila lugar. Pakadto sa sentro sang New Bataan ang mga sibilyan sang pungan sila sang militar nga nagsiling sa Sityo Mother of Perpetual Help na lang sila magtener, bisan malapit ini sa lugar sang mga inaway sang militar kag BHB. Gininsister gihapon sang mga sibilyan ang pagpadayon sa poblasyon, kon sa diin ginhimo nga temporaryo nga *evacuation center* ang New Bataan Gym. Nagtener ang mga sibilyan sa poblasyon sang New Bataan tubtub Nobyembre 1. Bunga sang serye sang mga operasyon militar, ginbutang sa *state of calamity* sang meyor sang New Bataan ang Barangay Andap kag kaingod nga Barangay Manurigao.

Oktubre 31. Biktima sang hasment ang mamahayag nga si Loreto Rosario, reporter sang dxMS, sang magreport siya bahin sa pagkasunog sang Field Supply Support Unit sang AFP nga ara sa sulod sang Camp Siongco sa Datu Odin Sinsuat, Shariff Kabunsuan. Suno kay Rosario, ginsita siya ni Col. John Oswald Bucu, kumander



sang Camp Siongo, kinumpiska ang iya *press card* kag mga *cellphone* kag gintawag nga pakialamero.

Oktubre 30. Gindakup sang gintingub nga mga elemento sang Caloocan Police kag Intelligence Service of the AFP si Norberto Murillo Sr., 52, sa iya balay sa Camarin, Caloocan City. Si Murillo, nga ginaakusahan nga upisyal sang Partido Komunista sang Pilipinas (PKP) iligal nga gindakup base sa himu-himo nga kaso sang pagpatay kaangot sa natabo kuno nga purgahan sa Hilonos, Leyte sadtong 1985.

Oktubre 24. Himu-himo nga kasong pagpatay kag pagpangawat ang gingamit nga rason agud arestuhon ang mag-asawa nga Margie Lupo Navia kag Donato Palo sa Barangay Bolo, Labrador, Pangasinan. Sanday Navia kag Palo, nga ginaakusahan nga upisyal sang PKP sa Quezon gin-aresto sang mga pulis sang Pangasinan samtang nagapakadto sa balay sang ila mga himata. Ginda-

la sila sa hedkwarters sang 3rd Intelligence Service Unit sang Philippine Army sa Tarlac.

Oktubre 13. Isa ka lalaki ang malubha nga napilasan matapos ini iguon sang *shrapnel* halin sa M203 nga ginpalupok sang mga suldado sa Barangay Sanghay, Mati, Davao Oriental. Nagabantay sadto sang iya tiyangge si Isidro Gerona, 60, sang mag-away ang BHB kag mga elemento sang 72nd IB. Nagdinalagan ang pamilya Gerona agud makapalayo sa lukpanay pero nabilin ang ila amay. Ginbalikan ini sang iya anak matapos mabatian ang mabaskog nga paglupok sang granada halin sa M203 sa ila balay. Nakita niya nga duguon ang iya amay kag patay ang ila idu bangud sa igo sang *shrapnel*. Guba man ang ila lamesa nga kalan-an. Suno sa anak sang biktima, nagpadayon ang wala pili nga pagpalupok sang mga suldado bisan madugay na nga nakahalina ang mga gerilya sang BHB. **AB**

Target: Mga aktibista sa Southern Tagalog

Nagaatubang subong sa masingki nga kampanyang pagpangtapna ang mga lider-masa kag aktibista sang hayag nga demokratikong kahublagan sa Southern Tagalog. Kwarenta ka lider kag myembro sang mga progresibong organisasyon sa rehiyon ang ginpasakaan sang rehimeng Arroyo sang himu-himo nga kasong kriminal. Baynte'y siyete sa ila akusado sa pagpanunog sang Globe Telecommunications *cell site* sa Lemery, Batangas sadtong Agosto.

Samtang, 17 sa mga akusado sa kaso sang Globe ang ginpasakaan man sang kasong marder kaangot sang ambus sang Bag-ong Hanga-way sang Banwa sa mga elemento sang PNP Regional Mobile Group sa Puerto Galera, Oriental Mindoro sadtong Marso 3, 2006 kon sa diin duha ka pulis ang napatay kag tatlo ang napilasan. Sitente'y dos katawo ang kabilugan nga isip sang mga akusado sa kaso sa Oriental Mindoro, kag 30 sa ila mga hayag nga lider-masa kag aktibista.

Isa-isa na subong nga ginadakup ang mga akusado sang mga kaso nga ini.

Pinakaprominenteng biktima si Atty. Remegio Saladero, puno nga abugado sang KMU. Iligal siya nga gin-aresto sang gintingub nga mga elemento sang Antipolo Police kag Military Intelligence Group 4a sang


ISAFP sa iya balay sa Antipolo City sadtong Oktubre 23 kag gindala masunod nga adlaw sa Calapan City, Oriental Mindoro para sa bisita sa himu-himo nga kaso nga ginpasaka batuk sa iya. Isa man si Saladero sa mga akusado sang arson kaangot sang pagsunog sang *cell site* sang Globe Telecommunications.

Sini naman nga Nobyembre 3 gin-aresto si Rogelio Galit, tagapamababa sang Kalipunan ng mga Magsasaka sa Kabite (Kamagsasaka-Ka) sa iya balay sa Silang, Cavite kaangot sang kaso sa Oriental Mindoro. Isa ka tuig na nga nagahigda sa katre si Galit bangud sa balatian nga *diabetes* kag nakatala-

na nga operahan sang dakpon siya sang 15 elemento sang Cavite PNP kag *regional intelligence*. Gindala man siya masunod nga adlaw sa *provincial jail* sang Calapan, kon sa diin nakadetina man ang tatlo pa niya nga lunsay akusado nga sanday Attorney Saladero, Nestor San Jose kag Crispin Zapanta. Si Zapanta, *coordinator* sang Bayan Muna sa Antipolo City gin-aresto sadtong Oktubre 27.

Mabaskog nga ginpakamalat ng lain-lain nga progresibong organisasyon ang ginahimo nga paglagas sa mga lider-masa kag aktibista sang Southern Tagalog. Siling

ni Bayani Cambronero, *regional coordinator* sang Bayan Muna-Southern Tagalog, ang kampanyang pagpangtapna kabahin sang pagkriminalisa sa mga aktibista. "Ginapasakaan kami sang gubyrong Arroyo sang himu-himo nga kaso bangud sa kapaslawan sini nga pahipuson kami paagi sa ekstrahudisyal nga pagpamatay," siling niya. **AB**





Nagadamo nga sibilyan nga Moro ang biktima sang militarisasyon

Nagapadamo nga nagapadamo ang numero sang mga sibilyang Moro ang ginabiktima sang mapintas nga operasyon militar sang Armed Forces of the Philippines (AFP) sa pila ka bahin sang Mindanao.

Suno sa report sang International Committee of the Red Cross (ICRC) sadtong Oktubre 29, sa mga *evacuation center* sa Datu Piang, Maguindanao pa lang may ara na sang 55,000 indibidwal nga nagbakwet sa tagsa nila ka puluy-an, halin sa 35,000 katawo sadtong Agosto. Umpisa Agosto tubtob ikatlong simana sang Oktubre, nagaabot sa 127,164 pamilya ukon 611,753 indibidwal ang naapektuhan sang mga enkwentruhanay sa tunga sang MILF kag AFP sa mga prubinsya sang Lanao del Norte, Lanao del Sur, Sultan Kudarat kag Maguindanao.

Lapnagon ang pagkatublag. Ang masingki nga militarisasyon nagdala sang lain-lain nga problema sa pamensaron sang mga bakwet. Suno sa pagpanayasat sang Commission on Human Rights (CHR) sining Oktubre, lapnagon ang mga palatandaan sang *traumatic distress* sa mga bakwet pareho sang pagkatublag, mahadlukon kag grabe nga mapagsuspesa. Ang amo nga sintomas nakita sa mga bakwet halin sa Lanao del Norte nga nagbakwet pakadto sa Kauswagan kag Kolambugan sa amo nga prubinsya kag sa 17 ka iban pa nga *evacuation center* sa Ozamiz City kag Tudela sa katambi nga prubinsya sang Misamis Occidental. Siling sang CHR,

isa sang kabangdanan sini ang kahadlok sang mga bakwet bunga sang paglapta sang mga balita nga may malapit nga inaway sa tunga sang AFP kag MILF.

Ginatublag man pati ang mga Moro nga nagaestar pa gihapon sa tagsa nila nga ka baryo. Suno sa *Luwaran*, ang *website* sang MILF, madamo sang residente sang Barangay Inas kag Dungguan sa Mlang, North Cotabato ang nagpang-empake kag naghanda nga magbakwet pagkatapos umpisahan sang militar ang pagsensus sang mga residente nga Moro sadtong Oktubre 18. Wala sang ginhatag nga rason ang mga soldado sa ginhimo nila nga pagsensus gani nagsuspetsa ang mga Moro sa lugar nga may "ginasluto" ang militar batuk sa ila.

Indi katingalahan ang kahadlok



nga nabatyagan sang mga Moro sa nasambit nga lugar. Duha ka adlaw antes umpisahan sang mga soldado ang sensus sa Mlang, tatlo ka sibilyan ang gindukot sang mga elemento sang 40th IB sa Barangay Nalapaan sa malapit nga banwa sang Pikit, North Cotabato. Ang mga gindukot amo sanday Rahman Suleik kag si Tontongan Dilangalen.

Sa katambi nga prubinsya sang Maguindanao, anom ka tawo ang basta na lang ginaresto sa Barangay Linantangan, Mamapasapano sadtong Oktubre 16 kag ginpangbakol. Nakilala ang mga biktima nga sanday Aladin Lamalan, Bing Datuan, Alimudin Ibrahim, Daud Ibrahim, Binyamin Abdulatip kag isa nga nagahingalan lang Kaumbo. Ara pa sa kamot sang militar ang apat sa ila.

Masobra man 100 balay sang mga sibilyan ang ginsunog sang mga soldado sa Barangay Nimao kag Andabit sa Datu Piang, Maguindanao sining tunga-tunga sang Oktubre, suno gihapon sa *Luwaran*.

Mga bakwet, ginapagutman sang AFP. Samtang, mabudlayan na nga daan ang mga bakwet gindingutan pa sang AFP sang kinahanglanon nga ayuda. Ginapunggan sang mga soldado sang 54th IB sadtong Oktubre 23 ang isa ka komboy sang United Nations World Food Programme sang mag-agi ini sa isa ka tsekpoynt sa Dapiawan, Datu Piang, Maguindanao nga may dala-dala nga pagkaon. Para tani ini sa ginatos ka pamilya nga bakwet sa Libutan, Mamasapano, Maguindanao nga ginagutom na umpisa pa sang dumilian sila sang mga soldado nga magtrabaho sa ila mga ulumhan kag anihon ang ila mga produkto. Ang mga nangahas nga magkadto sa ila mga ulumhan ginatiro. Duha na ka mangunguma ang napilasan, suno sa *Luwaran*. AB

Magapadayon ang mga imperyalista nga polisiya sang US sa idalum ni Obama

Ang masunod ginhalaw sa pahayag nga ginpaguwa sang Partido Komunista sang Pilipinas sining Nobyembre 7.

Ginasalaming sang pagdaog ni Barack Obama sa eleksyon presiden-syal sa US ang lapnagon nga pagsikway sang pumuluyong Amerikano sa militarista kag neokonserbatibo nga rehimeng Bush. Si Obama, nga nagdalagan sa idalum sang Democratic Party, nagalarawan sa kaugalingon bilang kabaliskaran kuno sang Republican nga si George W. Bush. Ginhingalitan niya ang subong nga mabaskog kag lapnagon nga disgusto sang pumuluyong Amerikano sa rehimeng Bush, ilabi na sa atubang sang dalagku nga kalutusan pangpulitika kag pangmilitar sang US sa Iraq kag Afghanistan kag sang pinakamalala nga krisis pang-ekonomya sa US halin sadtong Great Depression.

Pero anuman nga pagkatuhay nanday Obama kag Bush nagaburon pag-abot sa tindog nila bahin sa nagapadayon nga mga imperyalistang polisiya sang hegemonismo, pagdambong kag gera. Ginapakita sang ila basehan nga pagkapareho sa tindog nila bahin diri nga ginatiglawas lamang nila ang duha ka paksyon sang monopolyo burgesya sang US.

Ang nagakatabo nga nagapadalum nga resesyon kag desperasyon sa US kag pangkalibutanon nga sistemang kapitalista nagaduso sa US nga paigtingon ang imperyalistang pagpanghimulos, pagpandambong kag pagpang-ulipon sa kaugalingon nga pungsod kag mga malakolonya sini, mag-agaw sang iban nga erya sang pagpalapad kag maglunsar sang mga gera kontra-rebolusyon kag gerang agresyon.

Padayon nga palaparon sang US ang *military-industrial complex* sini, magapakita sang kusog-militar kag magalunsar sang daku kag ginagmay nga gera agud iduso ang hegemonismo sini, pungan ang mga karibal sini nga buhinan ang malapad sini nga kaharian kag mang-agaw sang bag-ong mga merkado kag teritoryo para mapasanyog pa ang pagpandambong kag impluwensya sang US. Si Obama maga-


serbi nga panibag-o nga pangunahong instrumento lamang sang tanan nga ini. Magaserbi nga mapaniplang nga tabon sa agresyon kag hegemonismo sang imperyalismong US ang populista nga retorika ni Obama.

Ang matuod nga paliwat-liwat nga gina-endorso ni Obama ang teroristang gera nga ginsuguran ni Bush. Ginapanugyan niya ang pagdugang sang 10,000 tropa sa Afghanistan kag paglunsar sang *unilateral strike* sa mga dulunan sini kag Pakistan, para kuno lagson ang al-Qaeda. Samtang nagapanawagan nga paulion na ang mga tropang Amerikano halin sa Iraq, ginaathag man niya nga dapat kuno padayunon sang US ang presensya militar sini didto agud sigurhon nga ipatuman

sang papet nga gubyernong Iraqi ang mga dikta sang US.

Sadtong Hunyo, gintib-ong ni Obama ang padayon nga interbensyon militar sa Pilipinas sang ham-balon niya nga suportahan niya ang Balikatan *military exercises* sandig sa “pag-abyanay” sang US kag sang neokolonyal nga kliyenteng estado sini. Lubos niya nga ginabalewala nga ginatabunan lamang sang Balikatan ang nagapadaku nga permanenteng presensya militar kag interbensyunismo sang US sa Pilipinas. Nagpanawagan na siya para sa pagpalapad sang mga programa para armasang militar sang Pilipinas. Hayagan ini nga pag-insulto sa ginatus-gatos ka libo nga nabiktima na sang Oplan Bantay Laya sang rehimeng Arroyo nga ginaubayan kag ginasuportahan sang militar sang US.

Mabaskog nga nagapanawagan ang Partido Komunista sang Pilipinas (PKP) sa pumuluyong Pilipino kag Amerikano kag sa mga pumuluyo sang mga malakolonya sang US kag iban nga mga pungsod nga nagabato para sa pungsodnon nga paghilway kag demokrasya nga indi magpatiplang sa bag-ong napilian nga presidenteng Amerikano. May kumpanyansa ang PKP nga ang sahing mamumugon kag pumuluyo sang kalibutan magapursiger sa ila paghimakas batuk sa imperyalismo kag reaksiyon, kag para agumon ang pungsodnon kag pangkatilingban nga paghilway, demokrasya kag kauswagan. **AB**



Alternatibong kumperensya sang mga migrante, madinalag-on nga nahiwat

Madinalag-on nga nahiwat sang mga progresibong organisasyon halin sa nagkalain-lain nga pungsod ang pinakauna nga internasyunal nga kumperensya bahin sa mga isyu sang mga migrante kag *refugee*. Ang International Assembly of Migrants and Refugees (IAMR) ginhiwat bilang alternatibo sa ikaduha nga Global Forum on Migration and Development (GFMD) nga ginhiwat sa Pilipinas sadtong Oktubre 28-30.

Madinalag-on man ang kampa-nya sang mga grupong migrante, sa pagpanguna sang International Migrants Alliance, para sa “Zero Remittance Day” sadtong Oktubre 29. Sa adlaw nga ini, ginlikawan sang mga migrante nga magremit sang anuman nga kantidad bilang protesta sa balayon kag mga kampanya sang GFMD.

Ginlunsar ang una nga porum sang mga imperyalistang pungsod kag institusyon pareho sang World Bank sadtong Hulyo 2007 para suportahan ang subong nga areglo kag polisiya sang pagkuha sang manggaranon nga pungsod sang barato nga kusog-pangabudlay. Ginahatagan sang rason kag ginaengganyo sini ang sobra pa nga pangkalibutanon nga eksportasyon sang mga mamumugon halin sa imol nga pungsod sa ngalan sang “*global migration*.”

Ginapalapnag sini ang panawagan nga “migrasyon para sa kauswagan” kag “kinamatarung sa migrasyon” para hatagan rason ang paghimulos sang manggaranon nga pungsod sa barato kag masinulundon nga kusog-pangabudlay halin sa mga atrasadong pungsod. Ginapagwa sini nga ang pagpadala sang mga remitans sang mga migrante sa ginhalian nga mga pungsod alternatibo nga pamaagi pakadto sa kauswagan kag solusyon sa kaimulon. Ginatiplang man sini ang paggamit sa mga remitans sang mga migrante para pun-an ang mga depisit sa badyet kag pangbayad sa utang panggwa sang mga atrasadong pungsod.

Tanda sang kapalpakan sini, gintipon sang GFMD ang pinakadaku nga pungsod nga nagalapas sa mga kinamatarung sang mga migrante. Wala man lang gin-imbatar diri ang mga organisasyon nga madugay na nagapakig-away para sa mga kinamatarung kag kaayuhan sang mga migrante.

Labi nga nagtingkad ang kapalpakan sini subong nga ginlunsar ini sa Pilipinas sa pagdumala sang rehimeng Arroyo. Wala sang makalabaw sa rehimen nga ini sa pagkadalok sa mga remitans sang mga migrante bisan pa sa kapahamakan kag kahalitan nila kag ila mga pamilya. Lubos ang pagbaton sang rehimen sa balayon sang GFMD

bangud ginapalig-on sini ang *labor export policy* sang estado kag pagsalig sa mga remitans bilang tagasalbar sang bangkarote nga ekomya.

Sa pihak nga bahin, nagtipun-tipon sa IAMR ang mga grupong migrante para pataason ang lebel sang ila paghiliusa kag palig-unon ang ila paghimakas para sa ila kinamatarung kag kaayuhan. Nagbayluhanay sila sang inagihan sa tagsa nila ginhalian nga pungsod kag mga pungsod nga ginaobrahan. Ginpakamaut nila ang balayon sang GFMD kag nagpanawagan sa mga gubyerno sa bilog nga kalibutan nga untatan na ang pwersahan nga migrasyon kag siguruhon nga may ara sila nga mga trabaho sa tagsa nila nga mga pungsod. Ginapanawagan man nila ang pagtahod sa mga kinamatarung sang mga migrante kag paggarantiya sa ila kaayuhan. **AB**

Pilipinas, ikalima sa mga pungsod nga ginagutom

IKALIMA ang Pilipinas sa mga pungsod nga ginagutom sa kalibutan, suno sa World Food Survey sang Gallup International-Voice of the People 2008. Ang listahan sang mga ginagutom nga pungsod ginpagwa sining Nobyembre 4 pagkatapos ang pagsarbey sa 58,000 katawo halin sa 55 ka pungsod sa Asia, Africa, Latin America kag Europe sadtong Hunyo kag Septyembre kaangut sang pagdumdom sang World Food Day.

Suno sa Gallup, 40% sang mga Pilipino ang nagasiling nga masami ukon kon kaisa wala sang makaon ukon kulang sa pagkaon sining nagligad nga 12 ka bulan. Naggwa sa sarbey nga pinakamataas ang tantos sang kagulutmon sa pungsod sa Metro Manila, ang pungsudnon nga kabisera kon sa diin apektado ang tunga sa milyon nga pamilya.

Ang mga pungsod nga ginsarbey sang Gallup kon sa diin pinakalala ang kagulutmon amo ang 1) Cameroon, 55%; 2) Pakistan, 53%; 3) Nigeria, 48%; 4) Peru, 42%; 5) Pilipinas, 40%; 6) Bolivia, 35%; 7) Guatemala, 35%; 8) Ghana, 32%; 9) Mexico, 23 %; 10) Russia, 23%.

Mas malala pa ang resulta sang sarbey ng Gallup kon ikumparar sa makatulublag nga resulta sang sarbey sang Social Weather Stations kon sa diin naggwa nga 16.8% sang pumuluyo nga Pilipino ang nakaeksperensya sang gutom sining ikatlo nga kwarto sang 2008.

Pagpanabon sa iskadalo sang "Euro Generals," ginpakamalaut

GINPAKAMALAUT nanday Rep. Satur Ocampo kag Teodoro Casiño sang Bayan Muna ang desisyon ni Rep. Rodolfo Albano, tagapangulo sang House Committee on Public Order and Safety, nga suspendihon ang imbestigasyon sa pila ka mataas nga opisyal sang Philippine National Police (PNP) nga ginatawag nga "Euro Generals". Wala ginaugyunan sang mga progresibong kongresista ang pagpangrason ni Albano nga ang kaso ginaimbestigahan na sang PNP, National Police Commission (Napolcom) kag Office of the Ombudsman.

Sanday Ocampo kag Casino ang tagsulat sang House Resolution No. 843 nga nagapanawagan sang lubos nga imbestigasyon sa walo ka opisyal sang PNP nga nagtambong sa pulong sang Interpol sa Russia sadtong Oktubre. Nagapauli na sila sadtong Oktubre 9 sang pungan sang mga pulis sa *airport* sang St. Petersburg si P/Dir. Eliseo de la Paz bangud sa dala niya nga P6.9 milyon (105,000 euros), sobra sa ginapahanugot sang kasuguan. Isa ka simana nga nakulong ang heneral upod ang iya nga asawa samtang ginpauli naman sanday P/Dir. Silverio Alarcio, German Doria kag Romeo Ricardo, Dep. Dir. General Emmanuel Carta kag Ismael Rafanan, Chief Supt. Jaime Caringal kag Supt. Elmer Pelobello.

Sa imbestigasyon sang Senate Foreign Affairs Committee sadtong Oktubre 23, indi maipaathag nanday Interior Secretary Ronaldo Puno (subong nga hepe man sang Napolcom) kag Police Director General Jesus Verzosa kon ngaa amo ina ka daku ang pabalon sa mataas nga opisyal sang PNP nga upod pa ang ila mga asawa. Sensilyo lang ang kantidad nga ini kon ikumparar sa minilyon nga pondo sa iban pa nga mga iskandalo nga nadalahigan nanday Arroyo kag mga alipures niya. Bisan

pa man, suno sa mga nagaduso nga imbestigahon ang insidente, imoral ini sa atubang sang malala nga katutuman sa pungsod.

Madamo sang ginhatag nga rason sanday Puno kag Verzosa nga nagapaburon kon indi man nagatambon lamang sa isyu. Siling niya, ang

dala nga kwarta "*cash advance*", "*contingency fund*" kag sining ulihi, pangbakal kuno sang mga kagamitan paniktik. Nagagwa nga maluwas sa P6.9 milyon nga dala ni De la Paz, anay comptroller sang PNP, may "*contingency fund*" pa nga P2.192 milyon ukon P274,070 kada isa.

Impeachment batuk kay Arroyo, gin-endorso ni JDV

GIN-ENDORSO ni anay Speaker Jose de Venecia Jr. ang kaso nga impeachment batuk kay Gloria Arroyo sining Nobyembre 4. Ginpirmahan niya ang mga papeles sini sa konsulada sang San Francisco, California upod ang mga Pilipino-Americano nga katapo sang Bayan-USA, Gabriela kag National Alliance for Filipino Concerns. Pormal nga isumiter ang dokumento sa Manubo nga Panalagan sa pagbukas sang sesyon sini sa Nobyembre 10. Kadungan sini, ginpahayag ni De Venecia nga gusto niya magtestigo sa kaso kag ibuyagyag ang tanan nga personal niya nga nahibal-an bahin sa mga kaso sang korapsyon nga dalahigan ni Arroyo.

Ang ikaapat nga kaso sang *impeachment* umpisa 2004 ginpasa-ka sadtong nagligad nga Oktubre sang anak ni De Venecia nga si Joey, Atty. Harry Roque kag Iloilo Vice Gov. Rolex Suplico. Nauna ini nga gin-endorso nanday Rep. Satur Ocampo kag Teddy Casiño sang Bayan Muna kag Rep. Liza Masa sang Gabriela Women's Party. Kalakip sa reklamo ang hayagan nga pang-abuso sa poder sang pangulo; mga paglapas sa konstitusyon; kaso sang korapsyon pareho sang NBN-ZTE Deal, Northrail Project kag P728 milyon "*fertilizer scam*"; kag mga ekstrahudisyal nga pagpamatay kag iban pa nga paglapas sa tawhanong-kinamatarung.

Samtang, padayon nga nagapanawagan sanday Archbishop Angel Lagdameo, presidente sang Catholic Bishops' Conference of the Philippines (CBCP); Archbishop Oscar Cruz sang Lingayen-Dagupan (Pangasinan); Bishop Emeritus Jose Sorra sang Legaspi (Albay); Bishop Joel Baylon sang Masbate; kag Bishop Socrates Villegas sang Balanga (Bataan) nga kinahanglan nga gilayon na nga bayluhan ang gobyerno nga Arroyo bangud sa malala nga korapsyon sini.

Ginsuportahan sang Bagong Alyansang Makabayan kag mga patriyotiko kag progresibong organisasyon ang panawagan nanday Lagdameo. Nagasuporta man si Archbishop Leonardo Legaspi sang Nueva Caceres (Camarines Sur); ang Bishop-Businessmen-Conference nga ginapamunuan ni Archbishop Antonio Ledesma sang Cagayan de Oro; National Council of Churches in the Philippines; kag Chief Justice Reynato Puno sang Korte Suprema. Nakig-isa man si Rev. Eddie Villanueva sang Jesus is Lord Movement nga nagapanawagan sa tanan nga lider sang CBCP, mga simbahan nga Protestante kag Evangelical, mga lider-relihiyoso nga Muslim kag iban pa nga grupo nga relihiyoso nga magsugilanon kag magbalay sang komun nga panindugan kag nagakaigo nga mga tikang.

**ANG****Bayan****Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo**

Edisyong Hiligaynon

Tuig XXXIX No. 21

Nobyembre 7, 2008

www.philippinerevolution.net*Editoryal*

Korapsyon sa tunga sang krisis

Liwat nga nabuyagyag ang wala katapusan nga korapsyon, kagarukan kag pagmaniobra sang rehimen ng Arroyo sa paglupok liwat sang daan kag bag-o nga dalagko nga kaso sang korapsyon. Labi nga nagtampok ang halambalanon subong bangud sa lain-lain nga padihut ang ginahimo sini para mapunggan ang imbestigasyon kay anay Undersecretary of Agriculture Jocelyn “Jocjoc” Bolante. Si Bolante, pu-no nga opereytor ni Arroyo sadtong 2004 sa pagpanulisan sang P2.4 bilyon nga pondo sang Ginintuang Masaganang Ani, ginpabalik sa Pilipinas pagkatapos ginabalibaran sang US ang ginhingyo niya nga *asylum* (pag-inakop) didto.


Wala sang kinatuhay ang mga maniobra subong sang nagaharing rehimen sa pagbusal man sini sa iban pa nga mahimo magtestigo bahin sa mga krimen nga ginadalalahan sang pamilyang Arroyo. Ang desperado kag baraghal nga pagtuyo sang rehimen ng Arroyo nga pungan nga maghambal si Bolante sa Senado nagapakita sang grabe nila nga pagkahadlok nga mahayag sa publiko ang ginadalalahan nila nga mga kagarukan kag krimen nga patud nga makapaigrab sa kaakig sang banwa.

Todo-todo ang pagtinguha sang re-

himeng Arroyo nga ipabilin nga nakasara ang mga sekreto sang kagarukan sa pondo sang Ginintuang Masaganang Ani ilabi na nga plano nila nga gamiton liwat ang amo nga iskema sa nagahilapit nga eleksyon 2010. Sa ginaproponer nga badyet sang rehimen para sa 2009, masobra P3.3 bilyon ang gintalana ni Arroyo para kuno sa pagbakal kag pagpanagtag liwat sang abono. Kabahin ini sang P7 bilyon nga bag-ong alokasyon para sa Ginintuang Masaganang Ani—ang mismo programa nga ginahimo nga bulugasan nanday Arroyo kag Bolante sadtong 2004. Wala-tuo ang iban pa nga padihot nanday Arroyo kag sang iya mga sulugon agud labi pa nga maubos ang kabang-maggad sang banwa.

Ang paglala sang korapsyon ni Arroyo sining ulihi nga mga tuig sang iya pagginahum kabahin sang mga paghanda niya para labi nga masiguro ang pagpabilin niya sa poder lampas sa 2010. Labi nga nagahugot ang kapyot niya sa poder sa labaw nga kakulba nga pasabton siya sa iya mga kasal-anan sa banwa.

Pila ka pulo ka bilyon nga pondo ang ginatipon ni Arroyo bilang preparasyon sa pagaatubangon niya nga mga pangpulitika nga inaway kadungan sang pagtinguha niya nga magpadayon ang iya poder lampas sa iya subong nga termino. Pagagamiton niya ini nga pangbakal sang suporta sang mga pulitiko para sa iskemang cha-cha

***Mga tampok sa
isyu nga ini...*****26 armas naagaw, 43
kaswalti sg AFP-PNP****PAHINA 4****7 detenido nga kaupod
sa Quezon, ginpalagyo
sg BHB****PAHINA 5****Imperyalismong US sa
idalum ni Obama****PAHINA 11**

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa angbayan@yahoo.com